

Ini ginadala sa inyo sang
Biblia Para sa mga Bata

Gintilawan sang
Ginoo ang
Pagpalangga ni
Abraham



Ginsulat ni: Edward Hughes

Gindrowing ni: Byron Unger; Lazarus
Alastair Paterson

Gin-adaptar ni: M. Maillot; Tammy S.

Gin-translate ni: Devie Grace Garcia

Ginpahimo sang: Bible for Children
www.M1914.org

©2023 Bible for Children, Inc.

May kinamatarong ka sa pagkopya ukon pag-imprinta sang sini
nga estorya, basta indi lang pag-ibaligya.






Isa ka gab-i ang Ginoo
naghatag kay Abraham
sang isa ka matanhagaon
nga sugo. Ini ang
pagtilaw para makita sang
Ginoo kon mas palangga ni
Abraham si Isaac nga iya

bata labaw pa
sang pagpalangga
niya sa Ginoo.



“Dal-a ang imo bugtong nga anak,
si Isaac, kag imo siya sunugon kag
ihalad.” Sugo sg Ginoo. Si Isaac
igahalad? Isakripisyo
ang iya bata? Sa
kabudlay para kay
Abraham. Palangga
niya ang iya bata.




Pero si Abraham nakahibalo magsalig sa Ginoo bisan pa indi nya ma intiendihan. Pagka-aga si Abraham naglakat sa bukid sang sakripisyo upod si Isaac kag ang duwa ka suluguon.



Antis maghalin, si
Abrahan nagbial sang
mga kahoy nga
inuggatong sa halad.
Si Abraham nagplano
nga tumanon ang
Ginoo.





Sang ikatlo nga adlaw sila nagapalapit na sa bukid. "Diri lang kamo" siling ni Abraham sa duwa ka suluguon. "Mataklad kami didto sa unhan kag magasimba, kag kami magabalik man kami dayon." Si

Isaac nagpas-an sang kahoy; Si Abraham nagadala sang pangsindi kag sang sundang.



"Diin ang karnero nga aton
sunugon para ihalad?"
pamangkot ni Isaac. "Ang
Ginoo ang magahatag sang
karnero." sapat ni Abraham.



Ang duwa nag-abot sa eksakto nga lugar nga ginpili sang Ginoo. Didto, si Abraham naghimo sang halaran kag iya ginplastar ang mga kahoy para masindiha ang halad sa atubang sang Ginoo.

Madamo na nga halaran ang nahimo ni Abraham. Pero amu ini ang pinakabudlay nga iya nahimo.



Gingapos ni Abraham si Isaac kag gintungtong ang iya pinalangga nga anak sa ibabaw sang halaran. Tuod ayhan nga patihon ni Abraham ang Ginoo kag isakripisyo ang iya pinalangga nga si Isaac, ang iya gaisahanon nga anak?





Oo! Sang gin-alsa na pataas ni Abraham ang sundang nagsidlak ang matalum nga bahin sini. Daw ginakumos ang iya dughan, apang nabal-an ni Abraham nga kinahanglanon niya nga tumanon ang Ginoo.





"Pag-untat!"
Ang Anghel
sang Ginoo
nagsinggit.
"Subong akon
napamatud-an
nga ikaw may
kahadlok sa
Ginoo. Wala
mo ginlikaw
sa Akon ang
imo bugtong
nga anak."



Si Abraham nakakita sang lalaki nga karnero sa mga kahoy-kahoy, iya ginkakas ang higot kay Isaac kag iya ginhalad nga sakripisyo ang lalaki nga karnero.



Sa amu sini si Isaac nakapaminsar, "Tuod ang Ginoo magahatag, suno sa ginhambal sang akon amay."



Samtang ang mag-amay nagasimba, ang Angel sang Ginoo nagsiling kay Abraham, "Sa imo mga himata, ang bilog nga pungsod pagabindisyunan tungod sang imo pagtuman." Maga-abot ang adlaw ang si Hesus pagabataon paagi sa himata ni Abraham.



Si Abraham kag Isaac nagpauli na. Nag-abot ang
tini-un sang kasubo. Napatay si Sarah. Nadulaan
sang asawa si Abraham, kag si Isaac nadulaan
sang iloy.



Pagkatapos sang
lubong, ginpalakat
ni Abraham ang iya
pinakamataas nga suluguon para
magpangita sang babaye nga magin
asawa ni Isaac.



Ang suluguon
nagkadto sa ila
ginhalinan nga banwa para
mangita sang palangasaw-on
sa mga paryente ni Abraham.



Ang suluguon nangamuyo sa Ginoo. "Ang babaye nga magahatag sang tubig sa akon kamelyo amu ang mangin angay para kay Isaac." Sa gilayaon si Rebeka ang naghatag sa ila sang tubig. Isa siya sa mga paryente ni Abraham. Nahibalu-an sang suluguon nga ginsabat sang Ginoo ang iya pangamuyo.



Ginbayaan ni Rebeka ang iya pamilya para pakasalan si Isaac. Iya sya gin-updan pagkatapos mapatay ang iya iloy. Palangga gid siya ni Isaac!



Gintilawan sang Ginoo
ang Pagpalangga ni Abraham

Isa ka estorya halin sa Pulong sang Dios,
Ang Biblia,

makita sa

Genesis 22-24

"Ang pagpahayag sang imo mga pulong
nagahatag sang kasanag." Salmo 119:130





Ang Katapusan

Ang ini nga estorya sa Biblia nagasugid parte sa aton matahom nga Dios nga nagtuga sa aton kag gusto niya nga makilala mo siya.

Nahibaluan sang Dios nga nakahimo kita sang malain nga mga bagay nga ginatawag niya nga sala. Ang bayad sa sala amo ang kamatayon, pero palangga gid ikaw sang Dios gani ginpadala niya ang iya bugtong nga Anak nga si Jesus agod mapatay sa krus. Ginsilutan siya para bayaran ang imo sala. Dayon nabuhi siya liwat kag nagbalik sa langit. Kon nagatuo ka kay Jesus kag ginapangabay mo siya nga patawaran ka sa imo sala, himuon niya ina! Magasulod siya kag magapuyo sa imo subong, kag magakabuhi ka kaupod niya sa wala sing katapusan.

Kon nagapati ka sa sini nga kamatuoran, ihambal ini sa Dios: Mahal nga Jesus, nagatuo ako nga Dios ikaw, kag nangin tawo agod mapatay para sa akon mga sala, kag subong buhi ikaw. Magsulod ka sa akon kabuhi kag patawara ang akon mga sala, agod may bag-o na ako nga kabuhi, kag sa pila ka adlaw magaupod ako sa imo sa wala sing katapusan.

Basaha ang Biblia kag estoryaha ang Dios adlaw-adlaw! Juan 3:16

